



Headline: Dua lagi diperdaya Macau Scam, lebih RM50,000 lesap

Publication/Portal: Utusan Malaysia

Date: 4 October 2020

Section: Dalam Negeri

Page: 37

Dua lagi diperdaya Macau Scam, lebih RM50,000 lesap

KEPALA BATAS: Walaupun kes ditipu oleh sindiket Macau Scam sering dilaporkan dan disiarkan dalam akhbar, masih ada segelintir anggota masyarakat yang menjadi mangsa membabitkan kerugian ribuan ringgit.

Semalam, seorang pembantu jualan berusia 27 tahun dan seorang pesara kerajaan berusia 70-an menjadi mangsa terbaharu dalam dua kejadian berasingan di sini.

Dalam kejadian pertama, pembantu jualan itu kerugian RM6,960 manakala pesara kerajaan itu pula kehilangan RM49,490 wang simpanannya selepas dipercayai terpedaya dengan sindiket tersebut.

Pembantu jualan itu pada mulanya menerima panggilan kononnya daripada pihak Pos Laju yang mendakwa terdapat bungkusan atas namanya yang berisi kad pengenalan dan pelbagai kad bank yang dikatakan ada kaitan dengan jenayah.

Ketua Polis Daerah Seberang Perai Utara, Asisten Komisioner Noorzainy Mohd. Noor berkata, panggilan mangsa kemudiannya disambungkan kepada seorang yang mendakwa anggota polis di Johor bernama Koperal Nizam.

Katanya, suspek memaklumkan mangsa terlibat dalam kes jenayah iaitu pengubahan wang haram dan memintanya mendedahkan semua maklumat perbankan.



“Koperal Nizam memaklumkan mangsa terlibat dalam pengubahan wang haram dan meminta semua maklumat perbankan atau berhadapan tindakan ditangkap.

“Mangsa yang takut kemudiannya telah memberi maklumat perbankan dalam taliannya serta dua nombor TAC yang dihantar ke telefon bimbit mangsa,” katanya kepada pemberita di sini semalam.

Noorzainy berkata, pesara kerajaan itu menerima panggilan daripada seorang lelaki yang mendakwa dari Pejabat Pos Seremban berhubung bungkusan yang mempunyai lapan keping kad kredit atas nama mangsa.

“Panggilan mangsa kemudiannya disambungkan kepada seorang polis berpangkat ‘sarjan’ di Ibu pejabat Polis Seremban dan dimaklumkan mangsa



Suspek memaklumkan mangsa terlibat dalam kes jenayah iaitu pengubahan wang haram.”

NOORZAINY MOHD. NOOR

terlibat dengan kes pengubahan wang haram dan dadah.

“Sarjan tersebut memberitahu mangsa bahawa dia adalah suspek kes tersebut serta memintanya memberi kerjasama.

“Terkejut dan terlalu takut, mangsa tanpa berfikir panjang terus mengikut arahan sarjan berkenaan dengan memindahkan wang melalui mesin ATM ke akaun bank diberikan melalui lima transaksi,” jelasnya.

Noorzainy berkata, kes itu disiasat di bawah Seksyen 420 Kanun Keseksaan kerana menipu.

Beliau menasihatkan orang ramai supaya sentiasa berwaspada dan tidak mudah terpedaya dengan muslihat serta tipu helah sindiket dan yang paling penting, jangan dedahkan maklumat peribadi dan perbankan kepada sesiapa termasuk polis.